



采芳隨筆卷十八

北平查 彬伯埜輯

水仙花妙品也一名配元一名儷蘭三餘帖以為和氣旁  
薄陰陽得理則配元榮于庭一曰女星散為配元六朝  
人呼為雅蒜為觀日䟽呼為女史花又名姚女花武當  
山土人謂之天葱洛陽花木記有金盞銀臺之名單瓣  
為水仙千瓣為玉玲瓏蓋一物二種耳亦有紅花者唐  
明皇賜虢國夫人十二盆盆皆金玉七寶所造集異記  
以蘭與水仙為夫婦花瓶花譜水仙一品九命瓶史水  
仙神骨清絕織女之梁玉清也三柳軒雜識以為雅客

學圃餘疎以為真歲寒友宋陳希夷詩云湘君遺恨付  
雲來雖墮塵埃不染埃疑是漢家涵德殿金芝相伴玉  
芝開韓持國維詩云黃中秀外翰虛通乃喜嘉名近帝  
聰密葉暗傳深夜露殘花猶及早春風拒霜已失芙蓉  
豔出水難留菡萏紅多謝使君憐寂寞許教綽約伴山  
翁黃山谷詩云淩波仙子生塵襪水上盈盈步微月是  
誰招此斷腸魂種作寒花寄愁絕含香體素欲傾城山  
礬是弟梅是兄坐對真成被花惱出門一笑大江橫又  
共郡送水仙花云折送東園粟玉花併移香本到寒家  
何時持上玉宸殿乞與官梅定等差又劉邦直送水仙

云得水能仙天與奇寒香窈窕動水肌仙風道骨今誰  
有澹掃蛾眉簪一枝錢塘昔聞水仙廟荊州今見水仙  
花暗香靚色撩詩句宜在林逋處士家又次韻云借水  
開花自一奇水沉為骨玉為肌暗香已壓荼蘼倒只此  
寒梅無好枝淤泥已作白蓮藕糞壤能開黃玉花可惜  
國香天不管隨緣流落野人家劉貢父詩云早於桃李  
晚于梅冰雪肌膚姑射來明月寒霜中夜靜素娥青女  
共徘徊張文潛詩云宮樣鵝黃綠帶垂中州未省見仙  
姿只疑湘水綃機女來伴清秋宋玉悲陳簡齋詩云仙  
人綃色裹縞衣以裼之青幌紛委地獨立春風時吹香

洞庭暖弄影清晝遲寂寂籬落陰亭亭與予期誰知園  
中客能賦會真詩范石湖詩云色界香塵付八還正觀  
不起况邪觀花前猶有詩情在還作凌波步月看楊誠  
齋千葉水仙云薤葉葱根兩不差重蕤風味獨清嘉薄  
揉肪玉圍金鈿細染鵝黃剩素紗臺璣原非千葉種丰  
容要是小蓮花向來山谷相看日知是他家是當家又  
水仙花云生來弱體不禁風匹似蘋花較小豐腦子醲  
熏衆香國江妃寒損水晶宮銀臺金璣談何俗礬弟梅  
兄品未公寄與金華老仙伯凌波仙子更凌空又詩云  
韻絕香仍絕花清月未清天仙不行地且借水為名開

處誰為伴蕭然不可鄰雪宮孤弄影水殿四無人又云  
江妃虛却蘂珠宮銀漢仙人謫此中偶趁月明波上戲  
一身冰雪舞東風額間拂煞御袍黃衣上偷將月姊香  
待倩春風作媒却西湖嫁與水仙王陳傅良詩云江梅  
丈人行歲寒固天姿蠟梅微著色標致亦背時胡然此  
柔嘉支本僅自持迺以平地尺氣與松篁夷粹然金玉  
相承以翠羽儀獨立萬槁中冰膠雪垂垂水仙誰強名  
相宜未相知刻畫近脂粉而況山谷詩吾聞抱太和未  
易形似窺當其自英華造物且霽威平生恨剛褊未老  
齒髮衰掇花寘膽瓶吾今得吾師劉後村詩云歲華搖

落物蕭然一種清風絕可憐不許淤泥侵皓素全憑風  
露發幽妍騷魂灑落沈湘客玉色依稀捉月仙却笑涪  
翁太脂粉誤將高雅匹婵娟徐竹隱詩云天然初不事  
鉛華此是無塵有韻花翠帶詎容縈俗客金杯只合勸  
詩家林下清風自一家稍親梅竹近蘭芽只緣羞與凡  
花伍移植名園不肖花又句云曉風洛浦凌波際夜月  
江皋解珮時來氏詩云瑤池來宴老仙家醉倒風流萼  
綠華白玉斷筭金暈頂幻成癡絕女兒花花盟平日不  
曾寒六月曝根高處安待得秋殘親手種萬姬圍繞雪  
中看元錢萬青選題水仙花圖云帝子不沉湘亭亭絕

世粧曉烟橫薄袂秋瀨韻明璫洛浦應求友姚家合讓  
王殷勤歸水部雅意是分香仇仁近題趙子固水墨雙  
鉤水仙卷云冰薄沙昏短草枯采香人遠隔湘湖誰留  
夜月羣仙珮絕暎秋風九畹圖白粲銅盤傾沆瀣青明  
寶玦碎珊瑚却憐不得同蘭蕙一識清醒楚大夫馬伯  
庸題水仙花圖云帝子湘南住白瑤苔生釵股織龍綃  
藥香金粟誰分劑閑鬪蘭苔上翠翹趙子固題水仙畫  
卷云自欣分得儲山邑地近錢清易買花堆案文書雖  
鞅掌簪瓶金玉且奢華酒邊已愛香風度燭下猶憐舞  
景斜礬弟梅兄來次第攬春熱鬧令君家鄧文原題子



固雙鉤水仙卷云仙子凌波珮陸離文魚先乘殿馮夷  
積氷斲雪揚靈夜鼓瑟吹竽會舞時海上瑤池春不斷  
人間金盃事堪疑天寒日暮花無語清淺蓬萊當問誰  
陳伯旅水仙圖云莫信陳王賦洛神凌波那得更生塵  
水香露影空清處留得當年解珮人姚文奐題虞瑞巖  
描水仙花云離思如雲賦洛神花容婀娜玉生春凌波  
韞冷香魂遠環珮珊珊月色新倪雲林水仙云曉夢盈  
盈湘水春翠蚪白鳳照江濱香魂莫逐冷風散擬學黃  
初賦洛神又墨水仙云宋諸王孫釋太雲清詩多為雪  
精神誰言一點金壺墨解寄湘江萬里春馬伯常臻集

句題張玉田水仙云賞月吟風不要論曳裾何處覓王  
門誰人得似張公子粉蝶如知合斷魂年文源巘題錢  
舜舉水仙梅花云橫出一枝誰與並整青蔥佩立多時  
牕明几淨好風日移向此中渠不知檀暈金杯兩擅奇  
晚風并作一香吹此中畢竟同還別付與司南鼻空知  
雪碗冰甌薦茗時蕭然相與對幽姿一生肝膽何由俗  
時有清風披拂之當代涪翁有素評此花雅合喚梅兄  
玉宸殿上重差次可是詩人許與輕老逋久共梅同住  
好事誰令侑水仙變化侯王等閑耳不堪持到影香前  
于斯立題水仙云夢落人間不記年月明清影裊翩翩

為問蓬萊幾清淺御風環佩欲冷然張天英子固水仙  
雨雪風月四首云水仙花上雨垂垂絕似華清賜浴時  
況是親承恩澤後託根只合在瑤池冰肌冷浸六花香  
姑射仙人試曉粧門外玉京天咫尺金璫瓊佩謁明光  
海上羣仙駕八鸞翠華裊裊玉珊珊寒臨風似學回波舞  
要博君王一笑看仙子騎龍出水瀕雪衣飛動月為神  
停杯飛唱凌波曲笑醒東都夢裏人鄭元祐子固水仙  
云仙姿豔玉肌輕拂五銖衣羅襪凌波去香塵蹙步飛  
丁鶴年詩云湘雲冉冉月依依翠袖霓裳作隊歸怪底  
香風吹不斷水晶宮裏宴江妃影娥池上曉涼多羅襪

生塵水不波一夜碧雲凝作夢醒來無奈月明何明劉  
文成公風中水仙圖云癡妒風家十八姨不爭好惡故  
相欺沅湘日暮波濤起翠蕩瑤翻欲渡遲李西涯題水  
仙云澹墨輕和玉露香水中仙子素衣裳風鬟霧鬢無  
纏束不是人間富貴粧屠赤水詩云娟娟湘洛淨如羅  
幻出芳魂儼素娥夜靜有人來鼓瑟月明何處去凌波  
蕭疎冷豔冰綃薄綽約風鬟露氣多直是靈根堪度世  
妖容知不傍池荷文衡山詩云羅帶無風翠自流晚寒  
微聾玉搔頭九疑不見蒼梧遠憐取湘江一片愁梁辰  
魚詩云幽脩閑處月微茫秋水凝神黯淡粧繞砌霧濃

空見影隔簾風細但聞香瑤壇夜靜黃冠濕小洞秋深  
玉佩涼一段凌波堪畫處至今詞賦憶陳王謝雲士承  
舉墨水仙云黑雲飛滿石池秋塗抹生綃散不收鉤鎖  
雪花無點迹浙江一夜素娥愁李君實日華子固水仙  
云幾番疑汝是水魂淺渚微霜月映門一暈輕黃破檀  
口半銖薄粉掩啼痕祝枝山錢選水仙云八斗才中畫  
洛神翠羅輕颺韞尖塵雪溪老子真能事更比陳王寫  
得親徐文長畫水仙付鷺峰寺僧云水仙畫裏妙氤氲  
蒼筤從茲等爛芸安得香巖真鼻孔一時成霧盡漫聞  
又題水仙蘭云自從生長到如今烟火何曾著一分湘

水湘波接巫峽宵，從峰上作行雲。杜大中詩云：玉貌盈  
盈，翠帶輕凌，波微步，不生塵。風流誰是陳思客？想像當  
年洛水人。靈雨濛濛，幻態輕驚，魂想像逝，懷傾願將。玉  
珮遙相逐，脫骨逍遙。水上人張銘盤詩云：玉質金相，翠  
帶圍霜華，月色共輝輝。江妃方欲凌波去，漢女初從解  
珮歸。王穀祥詩云：仙卉發瑤英，娟娟不染塵。月明江上  
望，疑是弄珠人。瑤環月下鳴翠帶，風中舉胡然。洛浦神  
胡然，漢濱女孫淇澳齊之詩云：碧江香和楚雲飛，鎖盡  
冰心粉色微。乍向月中看素影，却疑波上步靈妃。鍾伯  
敬暮春水仙花云：偶向殘冬遇洛神，孤情只道立先春。

今從九月過三月疑是前身與後身物值同時妒亦宜  
梅花今見子離離相逢洞口千紅裏素影當前君不知  
萬花如燄柳如烟常恐冰綃畏不前曾在水邊衣不濕  
可知入火不能然每笑梅花太畏喧一身自許歷寒溫  
春風特念冰霜後邀與春花共慰存近時王漁洋雪中  
水仙云花雪鬪鮮新輕盈似洛神明珠將翠羽併作可  
憐春又題畫云記取凌波微步來明珠翠羽共徘徊洛  
川祿祿神人隔空費陳王八斗才家初白詩云梳額檀  
心韻青裙縞袂姿浴波迎宓女越網得西施脈脈含情  
遠盈盈欲語遲月中曾解佩爭許俗人知田樂園詩云

也共寒梅點破春盈盈洛水擬丰神小齋招爾閑為伴  
喚作黃冠女道人張榆村元詩云紫金條脫降羊家常  
笑仙人萼綠華一曲橫塘半篙水杜蘅香裏月初斜又  
云得道謝塵緣委懷在孤迴君看清淺流中有婵娟影  
高章之詩云房已兼金麗葩仍截壁鮮護寒簾不捲妒  
影鏡分妍清賞今瓊閣孤芳舊石泉亭亭凡豔外種性  
近神仙方復齋雲旅句云胎本清虛心自皎貌雖柔弱  
骨原堅方鳧宗登嶧句云幾行翠羽浮秋水一掬瓊瑤  
產玉田方星巖莊句云胎從柔細沙中得根傍玲瓏石  
罅堅陶誕仙孚尹詩云澧蘭阮芷若為隣淡蕩疑生羅



襪塵昨夜月明川上望不知解佩贈何人曹麓蒿燠曾  
詩云江湍漱雲牙夜濯宓妃魄一洗羅襪塵踏霜曉無  
迹冰肌歸葯房清芬鬢中烏脈脈契素心踈梅影橫壁  
彭芝庭詩云珍重瓊花辱見貽珊珊仙子佩來遲影留  
夜月黃冠瘦香散東風翠帶披自謫瑤京歸未得長懷  
水國去無期白蘋騁望愁如許寢感湘靈弭節時杭堇  
浦題畫水仙云迢遙春波滿生綃翠作裳畫工真狡獪  
不寫入三香又題女士趙昭雙鉤水仙云寒山木落磧  
泉分小宛堂開辟蠹芸留得外家錢稿在一叢寒碧寫  
湘君吳穀人詩云懷之渺渺見娟娟相憶相逢幸有緣